

四庫全書

經部

欽定四庫全書

經部

周官集注卷十二

詳校官監察御史_臣施朝幹

刑部郎中_臣許兆椿覆勘

覆校官侍講_臣劉亨地

校對官待詔_臣胡士震

謄錄監生_臣莫興壽

欽定四庫全書

周官集注卷十二

翰林院侍講銜方苞撰

玉人之事

王氏詳說曰玉人一職與典瑞同典瑞言其名以及
其用玉人言其名及所制之尺寸然文多缺誤不若
典瑞之文有倫理也

鎮圭尺有二寸天子守之命圭九寸謂之桓圭公守之

命圭七寸謂之信圭侯守之命圭七寸謂之躬圭伯守之

命圭者王所命之圭也朝覲執焉居則守之子守穀璧男守蒲璧不言者闕文也故書或云命圭五寸謂之躬圭杜子春云當為七寸康成謂五寸者璧文之闕亂存焉

天子執冒四寸以朝諸侯

趙氏曰冒所以冒諸侯圭以齊信瑞方四寸其形方

正而邪刻其下諸侯來朝則輯而合之故諸侯瑞圭邪銳其首以合天子之冒也

天子用金上公用龍侯用璚伯用將

鄭剛中曰凡裸器前有龍口以流注中有璚如盤以盛鬯後有柄以執持用圭為之謂之將天子則三者用一玉成之故謂之金上公之裸器惟龍得如天子用玉其璚其將皆石之似玉者侯之裸器惟璚得如天子用玉其龍其將皆石之似玉者伯之裸器惟將

得如天子用玉其龍其璚皆石之似玉者

繼子男執皮帛

鄭剛中曰有天子之孤有公之孤大宗伯曰孤執皮帛天子之孤也典命曰公之孤四命以皮帛視小國之君二者皆執皮帛但天子之孤飾以虎皮公之孤飾以豹皮耳天子之孤不當繼子男之後故注謂此公之孤然典命又有諸侯適子未誓則以皮帛繼子男之文此文獨立上無所承意其斷簡失次也

天子圭中必

必讀如鹿車繹之繹謂以組約其中央也聘禮記五等諸侯及聘使所執圭璋皆有縹藉及絢組絢組所以約圭中央以備失墜若然圭之中必尊卑皆有此獨言天子舉上以明下也蓋羣下皆執圭以將事而天子端拱于上舉諸侯以下則疑于天子之不必然天子且用繹則執以將事者不必言矣

四圭尺有二寸以祀天

趙氏曰典瑞疏謂用一大玉琢出中央為璧形亦肉倍好四面琢出四圭各尺二寸與鎮圭同其璧為卣徑六寸總三尺與大圭三尺等皆一玉俱成兩圭祀地者亦然據此則四圭是就璧平出非植起者卽則于璧中琢成窩穴

大圭長三尺杼上終葵首天子服之

王所搢大圭也或謂之珽服之者搢于衣帶間也杼殺也終葵椎也圭首六寸方正如椎六寸下則兩畔

各減殺以下復方正○以文義推之似大圭三尺自下而上漸殺而所殺至葵首而終葵首謂上端不殺之六寸也据注䟽終葵為椎則文義俱不可通

土圭尺有五寸以致日以土地

裸圭尺有二寸有瓚以祀廟

惟人道用裸故獨云祀廟

琬圭九寸而縹以象德

琰圭九寸判規以除慝以易行

趙氏曰琰之為言剡也規圓也半其圓而剡之故曰判規

璧羨度尺好三寸以為度

好璧孔也爾雅曰肉倍好謂之璧好倍肉謂之瑗肉好若一謂之環餘見典瑞職

圭璧五寸以祀日月星辰

璧琮九寸諸侯以享天子

聘禮享君以璧享夫人以琮此不言后者統于尊也

此據上公九命若侯伯當七寸子男當五寸

穀圭七寸天子以聘女

大璋中璋九寸邊璋七寸射四寸厚寸黃金勺青金外
朱中鼻寸衡四寸有繅天子以巡狩宗祝以前馬

裸圭之盛鬯者謂之瓚璋之盛鬯者謂之勺其形略
同射四寸剡之以貫勺也邊所雕飾惟邊旁也鼻以
前注如瓚之龍口朱中謂鼻內通流處以朱漆飾之
也衡橫也勺如盤橫于中央故謂之衡天子巡狩過

大山川用事則以大璋灌焉中山川用中璋小山川用邊璋其牲用馬宗祝執勺以先之校人職曰將事于四海山川則飾黃駒

大璋亦如之諸侯以聘女

陳用之曰以文考之當繼天子以聘女之後亦如之者如穀圭之七寸也蓋聘女天子以圭諸侯以璋以是為降殺之等若以繼邊璋之後則邊璋有勺用酌以灌以加于聘女之束帛何義哉

瑑圭璋八寸璧琮八寸以頒聘

以瑑圭聘于王而享用璧以瑑璋聘后而享用琮制
八寸者上公之臣所執也其自相聘亦然侯伯之臣
宜用六寸子男之臣宜用四寸或曰既以瑑異其制
不嫌于皆以八寸也天子之下聘諸侯之上交同用
之

牙璋中璋七寸射二寸厚寸以起軍旅以治兵守

二璋皆有鉏牙之飾于剡側但牙璋文飾多故得牙

名典瑞文無中璋以大小等故不見也軍多用牙璋
軍少用中璋

駟琮五寸宗后以為權

駟讀為組以組繫之因名焉權稱錘也

大琮十有二寸射四寸厚寸是謂內鎮宗后守之

如王之鎮圭也琮本八寸兩旁各射二寸故十有二
寸宗尊也天子繼世故尊無與並若后則有尊有卑
惟祭祀賓客夫婦親之必時王之后若宮中內治王

之母若祖母在焉則卑者不敢專也故內鎮必宗后
守之而駟琮以為權亦稱宗后焉

駟琮七寸鼻寸有半寸天子以為權

以為權故有鼻也后權不言鼻者見于此則彼可知
也琮或五寸或七寸皆可以為權者以斤兩分寸決
于衡也

兩圭五寸有邸以祀地以旅四望

琬琮八寸諸侯以享夫人

獻于所朝聘君之夫人也不言瑑璧以享君文畧可知也諸侯享后以琮九寸則享夫人降用八寸而瑑馬宜也此亦據上公侯伯當六寸子男則用琥璜四寸若其臣聘瑑圭璋璧琮亦皆降一等而寸數則與君同○漿人職主之夫人有致飲于賓客之禮則諸侯亦宜有享夫人之禮三夫人視三公其亦用瑑琮享與

案十有二寸棗棗十有二列諸侯純九大夫純五夫人

以勞諸侯

案以玉飾案也十有二寸高廣之數也棗桌十有二
列總該果實之數每列用一案非一案之上具十二
列亦非十二案皆列棗桌也純皆也夫人諸侯之夫
人舉下以該上也曰后以勞諸侯則似夫人之禮異
舉夫人則后可知矣知后無異禮者上物不過十二
無以加也王合諸侯具十有二牢諸侯之長十有再
獻蓋二王之後不敢以臣禮待也凡勞以賓客之爵

命為等故諸侯之相勞其數同于王夫人之勞諸侯
其數同于后三夫人之勞諸侯亦然

璋邸射素功以祀山川以致稍餼

素功無瑑飾也

栒人

闕

雕人

闕

磬氏為磬倨句一矩有半

必先度一矩為句一矩為股而求其弦既而以一矩

有半觸其弦則磬之倨句也磬之大小各以律制此
假矩以定倨句非用其度也○俞氏曰上曲者為句
下直者為倨句即股也倨即鼓也股在上廣而短鼓
在下狹而長以長掩短則鼓長于股者半矩是倨得
一矩有半也以廣掩長則股廣于鼓者亦半矩是句
得一矩有半也

其博為一股為二鼓為三

博謂股之廣也其長則倍于廣故曰股為二鼓之長

又加一焉

參分其股搏去一以為鼓搏參分其鼓搏以其一為之厚

已上則摩其旁已下則摩其端

太上聲清也摩其旁則漸薄而就濁太下聲濁也摩其端則漸短而就清

矢人為矢鏃矢參分第矢參分一在前二在後

參訂之而平者前有鐵重也據司弓矢職第當為殺

○易彥祥曰三分其橐之三尺則一尺在前二尺在後後二尺之重與前一尺等則橐前之鐵極重故其發遲而近射用焉

兵矢田矢五分二在前三在後

鐵差短小也兵矢謂枉矢絜矢也此二矢亦可以田田矢謂矰矢○易彥祥曰橐前之鐵比殺矢短小故其發遠而火射用焉

綢矢七分三在前四在後

鐵又差短小也司弓矢職殺當為第不言矰矢者與第矢同制也○易彥祥曰豪前之鐵比兵矢又短小故其發高而弋射用焉不言恒矢庠矢者亦與第矢同也鏃之輕至第矢而極矣

參分其長而翹其一五分其長而羽其一矢豪長三尺殺其前一尺令趣鏃也

以其筈厚為之羽深

筈讀為豪謂矢幹古文假借字厚之數未聞

水之以辨其陰陽夾其陰陽以設其比夾其比以設其羽

辨正也陰沉陽浮就其浮沉而刻記之比謂括也蓋箭受弦處就陰陽之中間設比則兩畔各有陰陽而其分均否則陰陽各居一偏而矢行不直矣弓矢比在橐兩旁弩矢比在上下其設羽于四角同

參分其羽以設其刃則雖有疾風亦弗之能憚矣

羽六寸則刃二寸矢之輕重及羽刃皆相稱則其發

不可禦弗之能憚言不畏風之震撼也

刃長寸圍寸鋌十之重三琬

趙氏曰上文三分其羽以設其刃當二寸意者一寸刃也二寸則併鋌之出于豪外者言之

前弱則俛後弱則翔中弱則紆中強則揚羽豐則遲羽殺則趨

俛低也翔迴旋也紆曲也揚高飄也趨旁掉也上言其灋此又言其不中灋之狀

是故夾而搖之以眡其豐殺之節也橈之以眡其鴻殺之稱也

趙氏曰以指夾而搖之則羽豐殺之節可見橈其幹而屈之則強弱之稱可知羽欲有節故于豐殺言節
倚體欲相稱故于鴻殺言稱

凡相倚欲生而搏同搏欲重同重節欲疏同疏欲臬相猶豫也搏如搏黍之搏謂園也生而搏其園出于自然也欲重者貴其材之實也節欲疏者密則輕重

不等也。臬謂縝密而堅也。

陶人為甑，實二鬴，厚半寸，脣寸。

甑，無底甑也。脣，寸口邊加厚也。

盆，實二鬴，厚半寸，脣寸。

毛氏曰：盆以盛物，亦以為量。荀子曰：畝數盆。

甑，實二鬴，厚半寸，脣寸，七穿。

穿，其底使氣上蒸以熟物也。然則甑亦必以他物為底，如今竹筴之類與。

鬲實五鬴厚半寸脣寸庾實二鬴厚半寸脣寸

鬲盛水于下甑加于上炊以熟物鬴讀為斛受三斗
或曰豆實三而成鬴受斗二升十六斗曰庾

旒人為簋實一鬴崇尺厚半寸脣寸豆實三而成鬴崇
尺

崇高也豆實四升祭宗廟皆用木簋此瓦簋蓋祭天
地尚質器用陶匏或外小祀亦用之也

凡陶旒之事髻墾薜暴不入市

為其不任用也髻讀為刮或讀為跣謂器不正欹邪也墜有傷也辟破裂也暴墳起不堅致也

器中膊豆中縣膊崇四尺方四寸

膊讀如車輜之輜既拊泥而轉其均封膊其側以擬度端其器也縣縣繩以正豆之柄膊崇四尺以正其高也方四寸謂埴拊四畔各一寸以正其厚也凡器高于此則埴不能勝厚于此則火起不交因取式焉此言高與厚之所極其卑者薄者分有減殺皆可就

此以擬度也

梓人為筍虛

樂器所縣橫曰筍植曰虛

天下之大獸五脂者膏者羸者羽者鱗者

脂牛羊屬膏豕屬羸虎豹貔貅淺毛者之屬羽鳥屬
鱗龍蛇之屬凝者為脂釋者為膏

宗廟之事脂者膏者以為牲羸者羽者鱗者以為筍虛
外骨內骨卻行仄行連行紆行以脰鳴者以注鳴者以

旁鳴者以翼鳴者以股鳴者以胸鳴者謂之小蟲之屬
以為雕琢

刻畫祭器博庶物也外骨龜屬內骨蟹屬卻行蝓行
之屬仄行蠓屬連行魚屬紆行蛇屬脰鳴鼃屬注鳴
精列屬旁鳴蜩蛭屬翼鳴發皇屬股鳴蚣蜻動股屬
胸鳴榮原屬注當作味蟲喙也

厚脣弁口出目短耳大胸燿後大體短脰若是者謂之
羸屬恒有力而不能走其聲大而宏有力而不能走則

于任重宜大聲而宏則于鍾宜若是者以為鍾虛是故擊其所縣而由其虛鳴

燿讀為哨頤小也哨亦細小之義凡猛獸有力者皆前麓後細由自也

銳喙決吻數目顧脰小體寡腹若是者謂之羽屬恒無力而輕其聲清陽而遠聞無力而輕則于任輕宜其聲清陽而遠聞于磬宜若是者以為磬虛故擊其所縣而由其虛鳴

吻口勝也鳥喙長食物時則以近喙本決之故云決
吻數目目數開閉也顧長脰貌莊子曰其脰肩小
體股脰細也騫騰而上也凡羽物胸腹多向上
小首而長搏身而鴻若是者謂之鱗屬以為筍

言身圓且鉅也

凡攫綢援簪之類必深其爪出其目作其鱗之而
攫綢者攫著則殺之援簪者援攬則噬之也之而頰
頰也作猶起也

深其爪出其目作其鱗之而則于眦必撥爾而怒苟撥爾而怒則于任重宜且其匪色必似鳴矣

匪采貌與斐通

爪不深目不出鱗之而不作則必積爾如委矣苟積爾如委則加任焉則必如將廢措其匪色必似不鳴矣措頓也

梓人為飲器勺一升爵一升觚三升獻以爵而酬以觚一獻而三酬則一豆矣

勺所以酌酒也觚當為解豆當為斗劉氏曰一獻而三酬者獻以一升酬以三升也并而計之則四升為豆豆雖非飲器其計數則然

食一豆肉飲一豆酒中人之食也

一豆酒亦當為斗

凡試梓飲器鄉衡而實不盡梓師罪之

衡平也謂平爵鄉口而酒不盡也

梓人為侯廣與崇方參分其廣而鵠居一焉

崇高也方猶等也高廣等者謂侯中也天子射禮以九為節侯道九十弓弓二寸以為侯中則丈八尺諸侯于其國亦然鵠以皮為之居侯中三分之一則侯中丈八尺者鵠方六尺餘倣此

上兩個與其身三下兩個半之

个讀若齊人擗幹之幹上个下个皆為舌也身躬也鄉射禮記曰倍中以為躬倍躬以為左右舌下舌半上舌然則九節之侯身三丈六尺上个七丈二尺下

个五丈四尺其制身夾中个夾身中上下各一幅函
之身與个齊焉个或謂之舌者取其出而左右也侯
制上廣下狹蓋取象于人也張臂八尺張足六尺是
取象率焉

上綱與下綱出舌尋纁寸焉

綱持侯繩所以繫于植也纁所以聯侯而繫于綱也
張皮侯而棲鵠則春以功

皮侯以皮飾者司裘職曰王大射則共虎侯熊侯豹

侯設其鵠蓋各以其皮為鵠也詩曰射夫既同獻爾發功曰春以功者春祭擇士用此則夏秋冬不必言矣

張五采之侯則遠國屬

五采之侯謂以五采畫正射人所謂五正之侯也遠國屬者若諸侯朝會王與之射則張此侯所謂賓射也正之方外如鵠內二尺五采者內朱白次之蒼次之黃次之黑次之此九十弓之侯若七十弓者則三

正五十弓者則二正遠國對畿內諸侯為遠也

張獸侯則王以息燕

獸侯畫獸之侯也鄉射記曰凡侯天子熊侯白質諸侯麋侯赤質大夫布侯畫以虎豹士布侯畫以鹿豕凡畫者丹質息者休農息老物也燕謂勞使臣若與羣臣飲酒而射

祭侯之禮以酒脯醢

謂司馬實爵而獻獲者于侯薦脯醢折俎獲者執以

祭侯三等射皆同

其辭曰惟若寧侯毋或若女不寧侯不屬于王所故抗而射女強飲強食詒女曾孫諸侯百福

寧安也若如也屬繫也抗舉而張之也詒遺也此假祭侯以警諸侯也祭侯祭先有功德之侯若射侯則射不寧侯故兩言之

廬人爲廬器戈柲六尺有六寸及長尋有四尺車戟常首矛常有四尺夷矛三尋

柶猶柄也酋矛差短夷矛極長故異名以別之五兵
長短皆通柄與刃為尺數于戟獨曰車者步卒所用
止戈爰為便自戟以上長用于車上為多也

凡兵無過三其身過三其身弗能用也而無已又以害
人

人長八尺故兵之長極于三尋無已不但已也害人
害于用之者

故攻國之兵欲短守國之兵欲長攻國之人衆行地遠

食飲饑且涉山林之阻是故兵欲短守國之人寡食飲飽行地不遠且不涉山林之阻是故兵欲長

按司馬法云弓矢圍及矛守戈戟助

凡兵句兵欲無彈刺兵欲無蝟是故句兵桺刺兵搏

句兵戈戟屬刺兵矛屬或曰句兵謂矛刺兵謂戈戟也彈謂掉也蝟謂橈也齊人謂斧柄為桺則桺為隋園也○彈丸園而滑易詩曰蝟蝟者蝟蓋蠕動之貌皆以物喻也句兵握之固然後傳人無轉移故以彈

為病裨則不慮其彈矣刺兵搏則體圓而力強不慮其竭矣

數兵同強舉圍欲細細則校刺兵同強舉圍欲重重欲傳人傳人則密是故侵之

同強上下同也舉手所操也校疾也傳近也密審也正也操細以擊則運之便而勢疾操重以刺則審而正侵之義如陰陽之道侵謂其分偏勝也舉圍欲重則必增其分使偏強

凡為父五分其長以其一為之被而圍之參分其圍去一以為晉圍五分其晉圍去一以為首圍凡為首參分其長二在前一在後而圍之五分其圍去一以為晉圍參分其晉圍去一以為刺圍

被把中也圍之圍之也父柩八稜惟把中則圍晉謂柩下銅鐻所以插地及建車上者首父上鐻也刺矛刃胸也○為之被者以物裹之也凡兵把中必圍而以物裹之乃與手相得所握不過數寸而被圍五分

之一者以漸而殺乃堅固而無折傷也父之舉圍在下
端而矛之舉圍在一分二分之間者父數兵也執其
下端乃便于數矛句兵也其長二丈舉圍必近中乃
便于運矛不言被圍之長短必與父同也柶身則短
者必粗長者必細蓋柶圍與刃廣必相稱戈柶六尺
有六寸刃廣二寸則短者必粗可知矣戟常刃廣寸
有半寸則長者必細可知矣父長于戈則柶必細于
戈矛長于戟則柶必細于戟然後人力可勝經不明

著其圍徑者上士中士下士力各有所勝故秘之長短可制而粗細不可制也不言舉圍之徑亦以人所握為度也爰去三分之一以為晉圍者其秘圍較粗也矛去五分之一以為晉圍者其秘圍本細也更細則過弱而不可建矣

凡試廬事置而搖之以眡其蝟也爰諸牆以眡其梳之均也橫而搖之以眡其勁也

置猶樹也豎于地上以手搖之以視其蝟蝟然均否

灸猶柱也以柱兩牆之間輓而內之本末勝負可知也橫而搖之謂橫置于膝上以手握其兩端而搖之以視其堅勁與否○句兵欲無蝟而此又視其蝟者彼言用以直刺此言樹而搖之也用以直刺則慮其太弱而橈橫搖之而蝟則知其材堅忍而上下強弱之分均矣

六建既備車不反覆謂之國工

六建五兵與人也車不反覆謂兵之建于車上者馳

騁動搖而其柄無偏挺曲橈也

匠人建國水地以縣

欲造國城必先以器貯水平置地上然后于四角立四柱縣繩以正柱以水遙望其高下定其則以平地地既平乃可施視景正方之事○毛氏曰謂環地之四邊為溝而注水高下以水為平依水縣繩以為準水雖乾繩可正也

置槷以縣眡以景

置槲立表也于所平之地中央立八尺之表縣繩以正之視以景者視東西南北方位皆以此表之景也為規識日出之景與日入之景

河間王氏曰為規畫圓于表周也自日出以至日入記景端于圓周弦其兩端則東西正分中作線以指表則南北亦正

畫參諸日中之景夜攷之極星以正朝夕

河間王氏曰日中之景最短者也按景作線即南北

之正極北辰也北辰無星測近極之星以得北辰之位則南北亦可正司儀凡行人之儀不朝不夕朝夕即東西也不曰東西而曰朝夕者示不獨東西方位可正即日之出入晝夜之永短皆可正也○易彥祥曰以日出入之景與日中之景三者相參故曰參復以日中之景與極星之度兩者相考故曰考

匠人營國方九里旁三門

每方九里而四旁各有三門也舊說此公之城制非

也下經內有九室九嬪居之外有九室九卿朝焉又
曰宮隅之制以為諸侯之城制環涂以為諸侯經涂
則言王城之制明矣方九里者以徑言其週遭則三
十六里○王氏曰匠人既曰建國又曰營國蓋作而
立之謂之建言其始也周圍而治之以定其宮室涂
巷之制而興造焉謂之營言其終也

國中九經九緯經涂九軌

經緯謂涂也軌謂轍廣乘車六尺六寸兩旁各加七

寸凡八尺是謂轍廣九軌積七十二尺則此涂十二步也不言緯涂者與經同也下經經涂九軌環涂七軌野涂五軌而不及緯涂則與經同可知矣

左祖右社面朝後市

王宮所居也祖宗廟面猶向也王宮當中經之涂市朝一夫

方各百步○或疑一夫地隘不足以容市朝之衆然市有三市者各有所主易期而入則無壅矣大朝雖

曰諸侯萬民咸在然不過適來朝之諸侯萬民必耆
德為鄉邑之望者然後致而詢之非必徧致萬民也
惟大合諸侯朝廟不足以容然後為壇三成則四時
朝覲宗遇無不能容之患明矣

夏后氏世室堂修二七廣四修一

世室宗廟也修南北之深也夏度以步如堂修十四
步其廣益以四分修之一則堂廣十七步半

五室三四步四三尺

堂上為五室象五行也三四步室方也四三尺以益
廣也木室于東北火室于東南金室于西南水室于
西北其方皆三步其廣益三尺土室于中央方四步
其廣益四尺此五室居堂南北六丈東西七丈倒其
文曰四三尺者接上三四步明四步者廣益四尺三
步者廣益三尺也脩餘四步為堂之前後檐階廣餘
五步六分步之五為堂之東西屋翼堂之廣過于脩
故室所餘廣亦過于脩

九階四旁兩夾窻白盛

九階南面三三面各二明堂位三公中階之前北面
東上諸侯之位阼階之東西面北上諸伯之國西階
之西東面北上故知南面三階也窻助戶為明每室
四戶八窻白盛蜃灰也盛之言成也以蜃灰堊牆所
以飾成宮室

門堂三之二室三之一

門堂門側之堂正堂如上制則門堂南北九步二尺

東西十一步四尺室三之一者兩室與門各居一分
爾雅門側之堂謂之塾○門堂得正堂三之二而門
之左右各隔其半以為室廡其半以為堂則室所占
與門與堂校又居三之一也

殷人重屋堂修七尋堂崇三尺四阿重屋

重屋者王宮正堂若大寢也四阿四面皆注霑也重
屋重檐也或曰四面皆重檐不言廣者準夏制之廣
四修一也周制南北七筵東西九筵則不止于四之

一矣故特著之

周人明堂度九尺之筵東西九筵南北七筵堂崇一筵
五室凡室二筵

明堂者明政教之堂于三代或舉宗廟或舉王寢或
舉明堂明一代三者皆同制也曰凡室二筵者夏制
三四步四三尺中央室較深廣周則五室皆同也不
言東西廣者準以堂之廣也舊說四室在四隅按月
令四時中月皆居大廟而餘月居左右个則四室當

在四面之中今堂深七筵而南北中央三室已占六筵所餘一筵為前後檐階尚苦其狹豈周之五室竟連接為之而中央室之四面即用四室之戶牖與殷周制加備而堂室修廣轉約于夏未審何故

室中度以几堂上度以筵宮中度以尋野度以步涂度以軌

此記據周而作故詳于周以下皆周制也室中坐時憑几堂上行禮用筵宮中合院之內無几無筵故用

手之尋也在野論里數皆以步故用步涂有三道車
從中央故用車之軌

廟門容大局七个闌門容小局參个路門不容乘車之
五个應門二徹參个

大局牛鼎之局長三尺廟中之門曰闌門小局腳鼎
之局長二尺乘車廣六尺六寸言不容者兩門乃容
之五个三丈三尺此門半之丈六尺五寸也或曰曰
不容五个則自四个以上之數惟所取之但其數大

廣理不宜然豈五字乃三之誤與二徹之內八尺參
个二丈四尺二門以乘車為度者王乘五路所出入
也于廟門度以鼎扃于朝門度以乘車皆因物宜而
為之數也

內有九室九嬪居之外有九室九卿朝焉

內路寢之裏也外路門之表也外九室為朝堂治事
處則內九室亦九嬪治事處也六卿三孤為九卿
九分其國以為九分九卿治之

以九職任萬民各為一類故曰九分三孤佐三公論
道六卿治六官之屬

王宮門阿之制五雉宮隅之制七雉城隅之制九雉
雉長三丈高一丈阿謂門之屋脊隅者浮思謂小樓
也浮思蓋刻畫雲氣并蟲獸者城隅及闕皆有之五
雉七雉九雉皆言高也兼廣則不可通

經涂九軌環涂七軌野涂五軌

環涂謂環城之道國外謂之野

門阿之制以為都城之制宮隅之制以為諸侯之城制
環涂以為諸侯經涂野涂以為都經涂

古周禮說天子城高七雉隅高九雉公之城高五雉
隅高七雉侯伯之城高三雉隅高五雉都城之高皆
如子男之城高據此經都城之制與侯伯等則子男
之城不應降于都亦宜與侯伯等然則此經所言獨
上公之城制也

匠人為溝洫耜廣五寸二耜為耦一耦之伐廣尺深尺

謂之畎田首倍之廣二尺深二尺謂之隧

古者耜一金兩人併發之其壟中曰畎畎上曰伐伐之言發也畎畎也田中水所流也後世之耜歧頭兩金象古之耦也田首一夫百畝之畔

九夫為井井間廣四尺深四尺謂之溝方十里為成成間廣八尺深八尺謂之洫方百里為同同間廣二尋深二仞謂之澮專達于川各載其名

載其名者識水所從出先儒謂遂人匠人之法不同

蓋以遂人百夫有洫而匠人成間謂之洫乃九百夫之地也遂人千夫有澮而匠人同間謂之澮乃九萬夫之地也不知百夫有洫而九百夫之地不過為洫者八其外始有澮環之千夫有澮而九千夫之地不過為澮者八其外始有川環之積至于九萬夫之地亦不過為澮者七十有二環澮之川九而已其環于百里之外者即環于三十里外之川也同間之澮積數雖多而其實即千夫之澮同間之澮所達之川即

千夫之澮所達之川然則遂人匠人之法實一而已
曰專達于川者溝洫必由澮以達澮則直達于川而
無或旁行側注于溝洫也

凡天下之地勢兩山之間必有川焉大川之上必有涂
焉

遂人萬夫有川人力所為之川也此經兩山之間必
有川天作地成之川也天作地成之川或數百里而
後有之以人為之川通焉然後尺寸之流皆距四海

而無壅漲之患矣

凡溝逆地防謂之不行水屬不理孫謂之不行

防謂脈理屬讀為注孫順也既曰逆地防又曰水屬不理孫者或強障遏使水注焉而非理之所順終必決溢也曰凡溝凡造溝瀆以引水者皆是也

梢溝三十里而廣倍

梢謂水漱蓄之溝水行漱蓄下流必廣

凡行奠水磬折以參五

奠定也磬折以參五謂溝形當如磬直行三折行五也凡行水欲其行又欲其定太疾則易衝決故必紆曲使少停以定其勢也

欲為淵則句于矩

大曲則流轉流轉則其下成淵

凡溝必因水勢防必因地勢善溝者水漱之善防者水淫之

漱猶齧也淫謂侵淫使泥沙淤積助防之厚也

凡為防廣與崇方其綢參分去一大防外綢

崇高也方猶等也殺者薄其上外殺謂三分去一之外更去也或曰非更殺其上乃益厚其下也下愈厚則上愈殺矣

凡溝防必一日先深之以為式

欲造溝築防先按一日所作尺數後則以此程功賦其丈尺步數防言高而亦曰深之者自上以視下也與聘禮壇十二尋深四尺義同

里為式然後可以傳衆力

傳附合也既以一日所作為式而又以一里為式者
人力有強弱功作有久暫以一里為式則所用非一
人所積非一日可以度衆力所能任附合以就功役
也

凡任索約大汲其版謂之無任

任用也索繩也約縮也汲引也築防若牆者用繩縮
其版引之大急則版撓而鼓土不堅矣詩曰縮版以

載又曰約之閣閣

葺屋參分瓦屋四分

葺屋草屋也三分屋之南北深以其一為屋脊高四分亦然草之去水遲瓦之去水疾故其峻之勢宜有差也

困窮倉城逆牆六分

困園倉穿地曰窮逆卻也築此四者六分其厚卻一分以為殺窮入地中亦為此殺者雖入地口宜寬則

牢固也

堂涂十有二分

堂涂堂前磚甃之道也爾雅曰堂涂謂之陳于兩旁之廣十分取二以為中央之峻則水旁瀉

竇其崇三尺

宮中水道

牆厚三尺崇三之

高厚以是為率足以相勝

車人之事半矩謂之宣一宣有半謂之櫪一櫪有半謂之柯一柯有半謂之磬折

矩法也所法者人也人長八尺而大節三頭也腹也脰也以三通率之則矩二尺六寸三分寸之二頭髮皓落曰宣尺三寸三分寸之一人頭之長也櫪斲斤柄長二尺伐木之柯柄長三尺人帶以下四尺五寸磬折立則上俛以下造末云磬折故先列其名

車人為末庇長尺有一寸中直者三尺有三寸上句者

二尺有二寸

庇謂耒下前曲接耜者句謂人手所執處庇上句下為中直以金刺土者曰耨耜前接于耨易曰斲木為耜宣上古以木為之後世乃接以金而謂之耨與自其庇緣其外以至于首以弦其內六尺有六寸與步相中也

緣外六尺有六寸而內弦則六尺應一步之尺數弦其內謂據庇面至句下直量之耕者以田器為度耜

異材故不在數中

堅地欲直庇柔地欲句庇直庇則利推句庇則利發倨
句磬折謂之中地

推者推而前也發者舉而起也中地之末其庇與直
者如磬折則調矣調則弦六尺

車人為車柯長三尺博三寸厚一寸有半五分其長以
其一為之首

首謂金刃柯其柄也凡造作用斧因以量物故先論

斧柄長短及其刃之大小

轂長半柯其圍一柯有半輻長一柯有半其博三寸厚
三之一渠三柯者三

大車轂徑尺五寸渠車罔也其徑九尺渠二丈七尺
輻長一柯有半亦大概言之轂徑九尺尚有轂空壺
中輻不應有四尺五寸也

行澤者欲短轂行山者欲長轂短轂則利長轂則安
澤泥苦其遲重山險慮其傾搖

行澤者反輳行山者仄輳反輳則易仄輳則完

反輳使木心在外也行澤者杼輳地處薄必用木心
乃堅久行山者侔可順面執之所向而為之矣曰仄
者輪材必用曲木因其斜仄之勢而輳之也

六分其輪崇以其一為之牙圍

輪崇輪徑也此大車之輪宜在渠三柯者三之下

柏車轂長一柯其圍二柯其輻一柯其渠二柯者三五
分其輪崇以其一為之牙圍

柏車山車也兩輻相對六尺渠圍丈八尺亦通轂空
壺中并數而言不言柏車輪崇之度者大車輻長一
柯有半而柏車長一柯大車之渠三柯者三而柏車
二柯者三則輪崇六尺不待言矣

大車崇三柯綆寸牝服二柯有參分柯之二

大車平地任載之車轂長半柯者也牝服見山虞職
乘車崇六尺有六寸綆三分寸之二大車輪加崇故
綆加廣也羊車柏車不言綆度者凡車之綆皆三分

寸之二獨大車較廣耳乘車之軫六尺有六寸又三分去一以為隧者御與左右並乘必衡廣乃能容而後不必長也大車徹廣六尺而牝服則八尺者衡狹而後長然後載物多而車行安也

羊車二柯有參分柯之一柏車二柯

羊善也羊車漢時謂之定張車宮中所用較長七尺羊車不言輪者與柏車無異也

凡為轅三其輪崇參分其長二在前一在後以鑿其鉤

鈞轅之鈎心也就其中而鑿之以鈎車箱也

徹廣六尺鬲長六尺

鬲謂轅端厭牛領者牛車兩轅一牛在轅內故鬲狹也不言四馬車之徹軛者輪崇車廣衡長參如一已見于輿人職也

人為弓取六材必以其時六材既聚巧者和之取幹以冬取角以秋絲漆以夏筋膠未聞

幹也者以為遠也角也者以為疾也筋也者以為深也

膠也者以為和也絲也者以為固也漆也者以為受霜露也

王光遠曰弓所以及遠者其力在幹所以疾發者其勢在角角幹資筋以為堅忍以射則中深三者得膠然後相合結而固之在絲飾而堅之在漆

凡取幹之道七柘為上櫪次之檠桑次之橘次之木瓜次之荆次之竹為下

爾雅曰柎櫪又曰檠桑山桑國語曰檠弧箕箠○李

耜卿曰櫪梓屬葉似杏而尖木瓜狀如柰

凡相幹欲赤黑而陽聲赤黑則鄉心陽聲則遠根

陽聲清聲也

凡折幹射遠者用執射深者用直

執謂用木之曲執反之以為弓也曲執則宜薄薄則力少直則可厚厚則力多

居幹之道菑栗不施則弓不發

菑栗謂以鋸剖折幹也也謂邪行絕理者發起也有

發起處則損動○居居積也蓄當作榴木之立死者
栗堅栗也冬析幹而秋合之待其槁也木有生而心
不直文理皆邪者初析不覺久槁則必偏挺居幹之
道必待槁燥如立枯之木堅栗而不邪迤然後合之
永不發動正與下苟有賤工必因幹之濕以為柔善
于外而動于內反對如舊說乃析幹必倫之義非居
幹之道也

凡相角秋牯者厚春牯者薄犂牛之角直而澤老牛之

角紛而昔

澤潤氣也紛絞纏之紋也昔讀為錯謂其紋絞纏而交錯也

痰疾險中瘡牛之角無澤

險傷也中角裏

角欲青白而豐末夫角之本蹙于剗而休于氣是故柔柔故欲其執也白也者執之徵也

蹙近也休讀為煦欲其執者欲其形之自曲可反以

為弓也○春秋傳而或噢休之蓋煦養之義不必易
讀

夫角之中恒當弓之畏畏也者必橈橈故欲其堅也青
也者堅之徵也

畏讀為隈弓淵也

夫角之末遠于剡而不休于氣是故脆脆故欲其柔也
豐末也者柔之徵也

末之大者必腦氣及煦之

角長二尺有五寸三色不失理謂之牛戴牛

三色本白中青末豐也牛戴牛謂角直一牛

凡相膠欲朱色而昔昔也者深瑕而澤紛而搏廉

郝仲輿曰色欲其朱文欲其錯其紋瑕深透光澤其
質紛密團結廉隅堅利此膠之善也

鹿膠青白馬膠赤白牛膠火赤鼠膠黑魚膠餌犀膠黃
凡昵之類不能方

皆煮其皮為之或用角餌粉餅也說文言其堅潔若

玉珥魚膠近之昵粘也方比也凡昵之類雖或可用以粘而不能比方六者

凡相筋欲小簡而長大結而澤小簡而長大結而澤則其為獸必剝以為弓則豈異于其獸

竹簡一條為一札謂筋條之直相似也結謂細聚而不散筋之小者貴乎條直而長筋之大者貴乎稹密而潤剝疾也

筋欲敝之敝

嚼之當熟

漆欲測

測測度也漆有真偽測之者挹而下注其細如絲而不斷乃無滓穢之雜

絲欲沈

如在水中時色

得此六材之全然後可以為良

凡為弓冬析幹而春液角夏治筋秋合三材寒奠體冰

析澇

液漬也三材謂膠絲漆奠定也至冬膠堅內之槩中
定往來體冰凝之時下弓于槩辨析其漆之堅完與
否而復內之

冬析幹則易春液角則合夏治筋則不煩秋合三材則
合寒奠體則張不流冰析澇則審環春被弦則一年之
事

易理滑致也以春和之時液角則其氣浹洽夏則筋

緩散故治之不煩流猶移也體既定則張之不至流
移審環義未詳舊說審定也其漆之瀉環則定後不
鼓動或曰回環而審定之也

析幹必倫析角無邪斲目必荼

倫謂木之理也荼讀為舒徐也目幹之節目荼之義
猶莊子所謂斲輪徐也蓋木之節目強斲之使其分
少寬乃不與筋相摩

斲木不荼則及其大修也筋代之受病夫目也者必強

強者在內而摩其筋夫筋之所由憺恒由此作

修猶久也憺絕起也

故角三液而幹再液

凡木材先以水漬而後乾之則調適而不偏挺先儒
多謂以火出其液非也蓋液之再三所以伸其材達
其性也將合之而微有偏挺然後以火橋之下經橋
角橋幹之法是也

厚其帛則木堅薄其帛則需

芻謂弓中裨幹雖用整木仍以木片細副之故厚薄有節

是故厚其液而節其芻約之不背約疏數必侔

厚猶多也節適中也約謂以絲橫纏之不背約謂有間也疏數必侔其相間之分必均也

斲摯必中膠之必均

摯之言致也中謂上下如一均謂厚薄無偏

斲摯不中膠之不均則及其大脩也角代之受病夫懷

膠于內而摩其角夫角之所由挫恒由此作

挫斲折也前以不中不均並列而後獨言懷膠者明
斲幹雖中而施膠不均亦能摩角而使之挫也

凡居角長者以次需

注疏弓隈謂之需長者當弓之隈短者居簫非也角
介于柎而上不達于簫兩畔各一角無所謂長者短
者所謂居角亦以居積言蓋弓有上中下三制故居
角取其長者以次排列而待用也

恒角而短是謂逆橈引之則縱釋之則不校

恒讀為桓竟也竟其角而短于淵幹引之角縱不用力若欲反橈然釋放弦也校疾也○橈曲也柎角長短強弱得宜然後引之以漸而曲其體如環順也角短則柎必長柎太長則中央強直而畏之曲也如折是謂逆橈惟畏過曲而如折是以引之則縱釋之則不校也

恒角而達譬如終絀非弓之利也

注疏謂達于簫頭非也簫與幹異材而逆俾角雖長
無上達于簫之理蓋謂直通挺臂也弓之制拊強畏
弱兩端微強然後張如流水若角長直通挺臂則中
弱挽之則中央先曲而畏與未反直挺而不應弦如
紕于韞近世有通角弓試之良然

今夫茭解中有變焉故校于挺臂中有拊焉故剝恒角
而達引如終紕非弓之利

茭解謂隈與簫相接之處變謂簫臂用力異也引之

則臂中用力放矢則簫用力用力異故校挺直也直
臂謂人所把握處柎側骨也把處兩畔有側骨助為
力故剽疾○校言其勢之疾剽言其力之勁舉是二
者正釋恒角而達引如終繼之義也蓋角之用兩端
不達于簫中央不達于柎乃調順而能助幹以為疾
若角達于簫而菱解中無變則送矢不疾角通于腋
而挺臂中無柎則負幹無力轉為不利于弓矣再言
角長之不利者角短不足用凡工能辨之其或貪角

材之長而用之不得其節尤可惜也○舊說中有變
謂簫與臂用力異果爾則辭不足以指事矣蓋抗弦
送矢全力在簫所謂末應也彈弓無簫故引之常縱
弓幹盡處忽以簫逆插幹間勾而向前其形制有變
故抗弦有力而送矢疾也菱簫別一木雖以筋膠合于弓
歧而以簫刺入故曰菱簫別一木雖以筋膠合于弓
幹而體本兩判故曰解

橋幹欲孰于火而無羸橋角欲孰于火而無燂引筋欲

盡而無傷其力鬻膠欲角而水火相得然則居旱亦不動居濕亦不動

羸過孰也燂炙爛也

苟有賤工必因角幹之濕以為之柔善者在外動者在內雖善于外必動于內雖善亦弗可以為良矣

濕生用之也

凡為弓方其峻而高其柎長其畏而薄其敝宛之無已應

峻謂簫也敝即把握處宛引之也無已應謂引之不
休止常應弦不罷需也○峻疑當簫隈之中而拄弦
者以其隆起故謂之峻簫狹而長不得云方也高其
柎謂于挺臂中置骨穹而隆起也宛疑當作挽以音
同而誤也無已應謂引之過度而其體能應不至于
折傷也○趙氏曰柎與敝人往往不能分別嘗見造
弓把處稍細把處上下皆堆起稍高挽接著角面蓋
敝即把處稍細者柎乃把處兩頭兩側畔稍高接角

隈者敝以正面言故云薄柎則置于兩側側目視之故不言厚而言高

下柎之弓末應將興

末即簫也興謂把握中搖撼也柎下力弱則簫應弦而動把握中必搖撼

為柎而發必動于綑弓而羽綑末應將發

綑即接中羽讀為扈緩也接中動則緩簫末應之角幹必至發傷○發即興也興者動于內發則暴裂于

外也綢當為角之接拊者舊說以為芟解芟解發動則未已發動不應又云未應將發矣蓋拊既搖撼則角之接拊者必發動角之接拊者既發動則弦偏斜而簫必應之而反脫也羽綢者角之兩旁甚薄其暴起有似于羽

弓有六材焉維幹強之張如流水

幹強而又能張如流水者質堅而柔忍也

維體防之引之中參

體謂內之繫中定其體防謂淺深所止若王弧之弓
往體寡來體多弛之五寸張之則一尺五寸夾庾之
弓往體多來體寡弛之一尺五寸張之則五寸唐弓
大弓往來體若一弛之一尺張之亦一尺體雖不同
及其引之皆三尺以矢長三尺須滿故也

維角定之欲宛而無負弦引之如環釋之無失體如環
角用反勢以掌拄于肘與峻之間故曰定之負弦謂
不應弦也釋之無失句矢謂反脫也弓不調則釋矢

時多反脫體如環謂既弛之後

材美工巧為之時謂之參均角不勝幹幹不勝筋謂之參均量其力有三均均者三謂之九和

有讀為又量其力又三均者謂若幹勝一石加角而勝二石被筋而勝三石引之中三尺弛其弦以繩緩環之每加物一石則張一尺

九和之弓角與幹權筋三倅膠三錡絲三郅漆三魁上工以有餘下工以不足

權平也倅猶等也角幹既平筋三而又與角幹等也
卽輕重未聞

為天子之弓合九而成規為諸侯之弓合七而成規大
夫之弓合五而成規士之弓合三而成規
材良則句少也此據弓體之不張者言

弓長六尺有六寸謂之上制上士服之弓長六尺有三
寸謂之中制中士服之弓長六尺謂之下制下士服之
凡為弓各因其君之躬志慮血氣

躬有長短血氣有強弱志慮有緩急豐肉而短骨直以立躬與血氣之異也寬緩以恭忿執以奔志慮之異也

豐肉而短寬緩以恭若是者為之危弓危弓為之安矢骨直以立忿執以奔若是者為之安弓安弓為之危矢骨直謂強毅忿執以奔謂執若有忿而奔赴狀其急也隈狹而簫甚曲者謂之危弓以其易反脫也隈廣而簫微曲則安苟弱而羽殺者謂之危矢以其飄搖

難定也。筈強而羽豐則安。

其人安其弓，安其矢，安則莫能以速中，且不深其人危。其弓危，其矢危，則莫能以愿中。

愿，慙也。三舒則矢行常不及，故不能疾中；中又不能深。三疾則矢行常過，故不能確然必中。

往體多來體寡，謂之夾庾之屬。利射侯與弋。

弛之則弓體往，張之則弓體來。來庾弓之弱者也。豻侯與弋皆近射也。司弓矢職：夾弓庾弓以授射豻侯。

鳥獸者弋繳射也

往體寡來體多謂之王弓之屬利射革與質

射深者用直王弓合九而成規則直之極于射堅宜也司弓矢職王弓弧弓以授射甲革椹質者此不言弧弓與王弓同也被弦之度有定而以多寡言者以往體之多而見為寡也以往體之寡而見為多也

往體來體若一謂之唐弓之屬利射深

射深用直唐弓合七而成規大弓亦然

大和無澇其次筋角皆有澇而深其次有澇而疏其次角無澇

大和尤良者也筋在背角在隈深謂澇在中央而兩邊無有也疏謂兩邊皆有澇而所用薄也角無澇則簫及背皆有之

合澇若背手文

弓表裏澇合處若人合手背文相應或曰用澇合法則文理如人手背言其細而均也

角環濶牛筋黃濶麋筋席蠃濶

角滑易故漆文如環筋用牛則漆文如麻子用麋則如斥蠃

和弓數摩

和猶調也數拂也弓久不用恐其性辟戾故將用必先調之拂摩所以調也大射禮小射正授弓大射正以袂順左右隈上再下一

覆之而角至謂之句弓覆之而幹至謂之侯弓覆之而

筋至謂之深弓

覆猶察也至猶善也弓有六材獨言角幹筋者弓以角幹筋為主膠漆絲則為之輔而已故秋合三材則謂之獻成而良苦可試也三者皆善為上二善為次一善為下不言王弧王弧必六材皆善故也

同官集注卷十二